

EMC UMS Terima Lawatan Kolaborasi CMeOSH UMK

Terakhir dikemaskini: Khamis, 27 Februari 2020 10:45 | [Cetak](#) | Jumlah paparan: 287



KHAMIS, 27 FEBRUARI 2020 - Pusat Pengurusan EcoCampus (EMC) Universiti Malaysia Sabah (UMS) menerima Lawatan Kolaborasi Strategik Pusat Pengurusan Persekitaran, Keselamatan dan Kesihatan Pekerjaan (CMeOSH), Universiti Malaysia Kelantan (UMK) pada Selasa lalu.

Lawatan yang diketuai oleh Pengarah CMeOSH, Prof. Ts. Ir. Dr. Hj. Ahmad Rasdan Ismail telah disambut Pengarah EMC, Prof. Madya Dr. Berhaman Ahmad.

Prof. Madya Dr. Berhaman dalam ucapan alu-aluannya mengutarakan kesungguhan EMC untuk berkongsi pengetahuan dan pengalaman dalam pelestarian persekitaran dan pemupukan gaya hidup hijau dalam kalangan warga universiti dan pemegang taruh.

“Sesungguhnya program perkongsian dan penerokaan peluang kolaborasi strategik sebegini amat selari dengan takrifan ‘EcoCampus UMS’ iaitu sebagai pusat rujukan dalam pembangunan lestari tempatan, kebangsaan, serantau dan sedunia.

“Kejayaan pelestarian persekitaran dan pemupukan gaya hidup hijau secara menyeluruh, khususnya dalam arena pengajian tinggi amatlah mustahak demi melahirkan masyarakat masa hadapan yang bukan hanya memiliki kesedaran alam sekitar yang tinggi malahan daya pematuhan dan pelaksanaan amalan hijau dalam kehidupan seharian yang kuat,” ujarnya.

Turut hadir Timbalan Pengarah EMC, Kelvin BH Kueh yang telah memberikan taklimat falsafah dan konsep Agenda EcoCampus UMS serta pencapaian dan cabaran sejak permulaan penubuhannya pada 2013.

